

Quilin Arends-Maduro cu hopi plan!

Stichting Casa Cuna Progreso ta conoce su Directora nobo

ORANJESTAD (AAN): Diahuebs 29 di augustus, SCCP a tene un conferencia di prensa caminda e señora Quilin Arends-Maduro a introduci su mes como directora nobo di Casa Cuna y a comparti cu e pueblo di Aruba globalmente kico su tarea principal ta y ki rol e pueblo di Aruba por tin den esaki.

Señora Quilin Arends-Maduro desde 1 di augustus e aña aki a tuma e reto di e funcion di directora na Stichting Casa Cuna Progreso.

Señora Arends-Maduro a duna di conoce cu el a worde guia pa ta eynan y cu su meta principal ta pa crea un ambiente di cas pa sirbi nos muchanan cu ta bay Casa Cuna na un manera optimal. Pa por haci esey lo mester zorg pa tin suficiente recurso pa drecha e cas, ekipa e personal mas y tambe pa por traha cu e famianan of prospecto famianan di e muchanan aki. Señora Arends-Maduro ta kere den traha hopi cerca cu e diferente instancianan (un integrale aanpak di e situacion) na e bienestar di e muchanan.

Di con e edad aki? Promer cu esaki, señora Arends-Maduro a traha den e sector bancario pa 11 aña y mei. Despues el a drenta enseñanza y a traha como maestra den e area di 'Economia y Management en Organizatie' pa 12 aña, entre otro na EPI, Hulanda y na Colegio Arubano. Na Colegio Arubano el a keda ultimo pa 7 aña.

“Mi ta stima hobennan tambe y a traha e trabao di maestra cu placer. Pero e aña aki mi a sinti e urgencia di por influencia e muchanan mas chikito. E motibo ta, cu mi ta kere cu e edad aki ta hopi importante mes y cu e influencia cu nos lo tin, lo ta mas grandi”

E edad di 0-8 aña ta atrae su persona paso e ta consiente cu SCCP tin e capacidad den su man pa influencia bidanan den e añanan cu nan ta mas vulnerabel y caminda e fundeshi den nan bida ta worde traha. Maske ta pa un tempo cortico mes..... loke bo haci den e edad ey, sea positivo of negativo por marca un bida di mucha pa semper. Eynan señora Arends-Maduro ta sinti cu Dios ta guiando e

awor.

Loke mi kier haci pa Casa Cuna: Manera señora Arends-Maduro a bisa caba, e kier crea un CAS di Casa Cuna. Un CAS caminda tur ciudadano di Aruba lo sinti orguyoso cu e ta existi y lo mira frutanan positivo mañan tambe den nos comunidad den e bida di e muchanan aki, cu no tabatin un comienso facil den nan bida.

Señora Arends-Maduro kier crea esaki door di envolve nos pueblo mas. Señora Arends-Maduro ta sigur cu na Aruba tin hendenan cu bon curason y cu kier yuda y señora Arends-Maduro kier coordina e deseo pa yuda cu e necesidad cu SCCP tin. Por ehempel, tin muchanan cu kier bay zwemles, bibliotheek, dansles, muziekles etc. of cu mester bijles of cu kier tin un maestro di gym. Kisas tin maestronan cu kier aporta di un forma of otro na SCCP.

Door di laga e pueblo di Aruba ta mihor na altura di con ta bayendo y kico SCCP tin mester, señora Arends-Maduro ta sigur cu SCCP lo haya mihor yudansa pa duna e muchanan aki un infancia mas agradabel y inolvidabel, caminda e mihor ta sali for di nan, asta ora no tin e fondonan directo pe di SCCP mes.

Tambe señora Arends-Maduro kier introduci lunanan cu diferente tema, caminda SCCP por traha ariba donacionan specifico por ehempel: luna di construccion (keda pendiente), luna di instrumento, luna di school etc etc.

Señora Arends-Maduro kier bin cu un programa financiero, asta kisas den samenwerking cu Imeldahof, cu lo mester traha mas detaya ainda ariba dje, caminda cu ta duna famianan na Aruba e posibilidad pa steun un mucha ariba su/e dlanan special di su bida, cu paña di school of di pasco etc.

Señora Arends-Maduro su experiencia ta, cu tin un deseo den e comunidad pa yuda pero hopi biaha pa falta di comunicacion no ta haya e forma pa haci esaki.

Un di SCCP su prioridadnan awor ta pa drecha e edificio y kier cuminsa anuncia na e pueblo pa keda pendiente pa su proximo actividadnan, caminda SCCP su tema central lo ta rond di e mantencion di e

lugar pa su 20 muchanan.

SCCP tin proyectonan grandi pendiente entre otro un proyecto pa yuda y guia mamanan jong cu nan yiunan. Tambe señora Arends-Maduro a anuncia cu pronto SCCP lo subi mundo social cu e.o. un Website, Facebook Page, Twitter etc.

Finalmente SCCP ta depende di subsidio y donacion pa asina e por sigui draai y señora Arends-Maduro tin tur confianza cu pronto e fondonan pendiente di subsidio di añanan anterior di gobierno por keda cla pa asina por traha ariba e diferente proyecto y plannan. Nos tin

bon relacion cu Minister y ta confia cu pronto nos lo tin e fondonan necesario pa traha ariba nos proyectonan y asina crea un ambiente mas agradabel pa nos chikitinanan y esunan cu ta traha hunto cu SCCP.